

四庫全書

史部

欽定四庫全書

史部

欽定八旗通志卷

一百七十三至
一百七十四

欽定四庫全書

欽定八旗通志卷一百七十三

人物志五十三

大臣傳三十九

滿洲鑲紅旗三

阿席熙

瑪祐

宏世祿 哈山

擴爾坤

噶

爾弼

遜柱

錫勒達

阿爾護

穆成額

阿席熙

阿席熙滿洲鑲紅旗人姓瓜勒佳

世祖章皇帝順治六年由兵部筆帖式遷本部主事九年

遷都察院理事官十二年遷兵部督捕左理事官
康熙元年遷光祿寺卿二年十二月考滿輔政大
臣鰲拜等令解任隨旗行走尋出征茅麓山坐罪
革職六年

聖祖仁皇帝親政鑒阿席熙無罪

命以郎中用七年二月授陝西布政使九年十二月巡撫
鄂善疏述其儉樸率屬革除陋規舉為卓異十一
年四月擢陝西巡撫十二年六月擢江南江西總

督十三年正月逆藩吳三桂犯湖南阿席熙疏請
遣發所屬兵赴援

諭以江南江西需兵防守不必遣發四月疏言耿精忠據
閩反叛賊兵一出汀州一出光澤與江西之贛州
建昌接壤請撥現駐安慶滿洲兵赴江西分道勸
禦又言杭州將軍圖喇以浙江兵力單弱咨請發
兵赴援雖江南在在需兵防守而隣封告急無容
坐視已於提標及狼山鎮標調馬兵二百步兵八

百遴遊擊一員領往浙江聽調遣疏入並

報聞七月增設江西總督阿席熙專轄江南時江西之廣
信建昌已為耿精忠賊兵所陷饒州叅將陳九傑
等叛應之

詔阿席熙於隣近饒州處增兵防守阿席熙疏言徽州府
屬休寧婺源祁門等縣與饒州接壤池州府屬建
德縣亦與饒州府屬之鄱陽浮梁二縣界址相連
已分選將弁率兵移駐各隘口加謹防禦疏甫上

績溪婺源二縣及徽州府城俱從逆阿席熙遣叅將馬之駿遊擊姚宏信等率兵隨江寧將軍額楚往勦先復績溪次復府城與婺源九月

上命簡親王喇布為揚威大將軍率師至江寧以將軍阿密達額楚華善王之鼎與阿席熙並叅贊軍務先是阿席熙以徽州及六安為盜賊淵藪請增兵三千分防堵禦部議以餼艱不允而允其募補江寧間甲千名至是疏請以六百名入徽州營以四百

名入六安營增設千把等官並各設副將一員擢
遊擊姚宏信劉才任之又徽州營增馬九十六安
營增馬五十以符馬一步九營制並從之十七年
七月疏言前經部議御史劉安國條奏令察核隱
漏地糧許自首免罪現年起科隨遍察江南全省
清出田地一萬四千四百七十餘頃草山八百六
十三里應徵銀三萬五千一百餘兩米麥豆三千
一百九十餘石今已照數徵完可撥充軍用得

旨阿席熙察出全省隱漏地畝錢糧俱完具見實心任事
可嘉下部議敘加兵部尚書銜二十年三月京口禦防
高騰龍因其族兄已故鎮江知府高得貴為巡撫
慕天顏檄追戶部核減草豆價銀七千餘兩於家
屬商之叅領馬崇駿以慕天顏浮冒奏銷各款計
告於將軍楊鳳翔鳳翔以奏銷非所預知寢其事
六月阿席熙劾奏馬崇駿高騰龍挾詐官民婪惡
多端請革職勘治

上命兵部郎中圖爾宸刑部郎中鍾有德赴鎮江察審馬
崇駿高騰龍尋遣人叩

閣訟慕天顏奏銷浮冒聞其首告乘秋審赴省與阿席熙
密商三晝夜捏款劾罷希圖箝口

上命圖爾宸鍾有德一併訊實定讞下部核議馬崇駿高
騰龍婪取事實論絞慕天顏奏銷浮冒經戶部核
減諉罪於無產可抵之已故屬員又因人訐告私
圖寢息應降三級調用仍賠核減銀兩阿席熙任

總督多年於婪贓官員置若罔聞直待其訐告巡撫始行糾劾應降二級以加級抵銷仍留任

上以阿席熙瞻徇慕天顏無可置辯

命降三級調用不准抵銷遂罷任還京尋卒

瑪祐

瑪祐滿洲鑲紅旗人姓哲栢由順治九年繙譯進士充王府教習授佐領兼刑部員外郎遷欽天監監正時巡撫缺員多推用漢軍給事中和和達因

有江南江西宜用滿洲之奏

聖祖仁皇帝康熙八年議政王大臣等奉

命會推滿洲郎中以上至學士通漢文有才能者為江寧
巡撫一再舉奏未當

上意遂

特簡瑪祐任之九年淮安揚州二府遇夏雨連綿田畝廬

舍被淹者多

詔發帑賑濟瑪祐疏請蠲免桃源等縣帶徵康熙元年至

六年積欠賦銀及六七兩年未完漕米部議漕米
無蠲免例

上曰桃源等縣屢被水災民生困苦漕米亦予蠲免瑪祐
又以蘇州松江常州三府遇水分晰成災輕重請
蠲減歲賦部議令再確查

上曰今年江南水災甚大比往年不同其被災情形曾經
科臣柯聶陳奏今瑪祐以低窪淹沒田地成災分數奏
請減賦部議再令詳察恐致遲延即照所請行十年疏

言蘇州松江二府額賦最重由明洪武初張士誠竊據其地久攻始克遷怒於民取豪戶收租簿付有司定稅蘇松兩府賦額較宋代多至七倍比元朝亦多三倍是以民力困竭積逋歲多現奉

旨分別官侵吏蝕民欠以次察追自康熙元年至八年民欠二百餘萬恐催徵亟而接踵逃亡舊欠仍懸新逋復積請

敕部察核蘇松二府浮糧酌量減除以期自後歲賦清完

疏下部議以科則久定寢其事時布政使慕天顏以蘇松頻遭水患議濬劉河淤道二十九里濬吳松江使復舊規建閘以時蓄洩瑪祐與總督麻勒吉疏請以漕折銀十四萬兩充費得

旨俞允給事中柯聶奏言東南水利宜乘此大工興舉時俾支河悉疏通且為善後計部議令巡撫籌覆瑪祐覆奏各州縣支河已次第興工疏濬其歲修可令里民分任劉河吳松江口為海潮渾沙所往來

宜責成府佐董水利者於每歲水發時用淘河之法以通淤滯其吳江縣長橋乃太湖洩水要道歲久未挑上流盡漲沙灘應令縣民協力開濬又疏言高郵興化諸州縣賑濟前議四月中停止今清水潭堤岸衝決田地復多淹沒請展限俟水涸可耕後疏皆下部議行是年以京口將軍李顯貴鎮江知府劉元輔侵饟事覺不先舉發部議降調得旨留任十五年六月卒於官年四十有九

上曰瑪祐自簡任巡撫以來悉心任事奮勉勤勞且清慎素著溘焉病逝朕心深為憫惻下部議卹

賜祭葬如典禮諡清恪

宏世祿

宏世祿滿洲鑲紅旗人姓瓜勒佳世居瓦爾喀祖
噶錫屯

太祖時率族衆來歸管佐領順治十一年十一月宏世祿
由佐領授護軍叅領十八年隨定西將軍愛星阿

出征雲南獲明桂王朱由榔於緬甸阿瓦城康熙
三年二月敘功授雲騎尉十二年二月擢鑲紅旗
蒙古副都統十四年三月撫遠大將軍信郡王鄂
扎副將軍圖海等勦察哈爾布爾尼

命宏世祿偕護軍統領哈克山副都統烏丹叅贊軍務四
月大軍薄達祿賊壘布爾尼設伏山谷擁衆三千
餘拒敵宏世祿率右翼兵與哈克山烏丹等進攻
伏發銳卒繼至我師合擊殲之布爾尼悉衆出列

火器拒戰宏世祿等縱兵分擊大敗之賊復收潰
衆拒山岡射却之分路掩殺無算布爾尼以三十
騎遁師還敘功加三等輕車都尉十五年二月調
滿洲副都統十九年三月逆孽吳世璠據雲貴同
都統瑪奇趙璉副都統祖植椿率兵往廣西叅贊
大將軍賚塔軍務二十年正月偽將軍何繼祖擁
賊萬衆距安籠所三十里堅據石門坎賚塔令都
統勒貝等率兵前進宏世祿與副都統赫呼布總

督金光祖分兵二隊繼之大敗賊衆奪石門坎隘
口恢復安籠所城二月偽將軍詹養王有功張光
先等九人據黃草壩我師分隊進擊宏世祿率頭
隊兵直進自卯至未擒斬賊千二百有奇乘勝自
曲靖迅馳恢復馬龍州易龍所楊林城時有賊屯
板橋之渾水塘及嵩明州城相為犄角宏世祿遣
營總碩塔幹都海等率兵往攻嵩明州克之渾水
塘賊聞風棄營夜遁進軍歸化寺十一月世璠自

殺雲南平軍旋復管佐領二十三年八月議政大臣等遵

旨甄別八旗大員以宏世祿庸劣不能彈壓下人請革職上以宏世祿年老免其黜退尋以老病乞休

允之二十七年正月卒

賜祭葬如例子龍科襲職孫佛保由佐領署火器營總隨大軍平定西藏雍正二年優敘給雲騎尉

哈山

哈山滿洲鑲紅旗人姓富察世居訥殷地順治十四年由官學生授鼓廳筆帖式康熙十五年遷禮部主事二十年四月監督九江關稅務八月疏言九江關定例徵船稅不徵商貨但僻在一隅惟江南等省往雲南貴州四川湖廣之船由此經過其往福建廣東廣西及江西省城者則由湖口縣入鄱陽湖近年用兵雲貴商船不至川木罕下僅徵湖廣一省商船是以歲多缺額惟湖口為八省咽喉

喉山水接壤之區移關於此不惟徵稅有餘且可
控扼八省臣查明宣德年間始立九江關嘉靖萬
厯中曾移湖口

本朝順治初年仍歸九江十二年監督費達復以移
關請下撫按議時撫臣郎廷佐以湖口地險易損
商船議寢康熙十六年監督梁忠以軍興需餉請
移湖口徵收部議不准所以屢移屢止者

聖心至仁不以足稅為急而以損船為念也臣今親往湖

口察看形勢縣城在江東岸大江由城西東北流
都陽湖之水南來會江城南沿山一里有狀元灣
三里有鳳凰磯五里有文昌洲此船自湖出泊處
城北臨江一里有麒麟河三里有武曲港五里有
柘磯港此船自江入泊處明代移闕時所築舊堤
雖壞可以修理停泊將九江僅徵湖廣一省商船
移於湖口與六省商船一體徵收庶不致缺稅額
下九卿科道議

命郎中伍什巴王九鼎會同巡撫李士楨詳勘奏言附近
湖口之八里江梅家洲三里江耽鵝洲琉璃江惟
水消可泊柘磯港武曲港文昌泖麒麟河虹橋港
狀元灣水漲可泊並繪圖以聞仍下九卿議九卿
等一議以順治三年至康熙十九年內溢額者二
十年共十二萬七千四百餘缺額者十五年共五
十五萬二千五百餘既移闕可以溢額應准行一
議湖口消漲隨時無一定泊處恐風濤不測有覆

舟之患關稅缺額之年皆因滇黔等省用兵商賈不行所致今各省蕩平商旅通行不致缺額議移未便得

旨仍著畫一議奏尋議移駐一年俟稅額具題到日再議得

旨先行後監督蘇赫裴憲度等以二十二年分所收船稅銀十二萬九百六兩零具題下部議作為額移關乃定二十一年遷兵部員外郎二十二年調吏部

二十三年

御試八旗文學之臣以

御製竹賦為題繙譯以覘滿漢文義自通政使以下筆帖式以上共五百餘員

上親定等第哈山列一等擢右諭德二十四年轉左二十九年遷內閣侍讀學士三十五年遷內閣學士三十六年二月調左副都御史六月遷

盛京禮部侍郎四十二年十月疏言臣部所役網戶

採牧校尉等八百二十五人內無力婚娶者百六十餘此等人役因無室家往往不務生計逃避官差請發

盛京戶部銀四萬兩倣照公庫例派員經理一分生息以六年為期本還戶部可得息銀二萬八千餘兩陸續給與無妻壯丁完娶銀人五十兩仍將餘銀生息久遠有益下部議從之四十九年五月遷吏部右侍郎五十年五月轉左

命往科爾沁審理台吉特古斯違禁留阿雜爾喇嘛一案
得特古斯及侍郎拉都渾欺飾狀具奏稱

旨如所擬降革有差旋署禮部尚書事十一月擢刑部尚
書列議政大臣五十一年五月

諭曰刑部事件甚屬緊要自補授哈山以來叅革劣員剔
除積弊辦理之事明而不煩一應積案漸次完結可謂
効力但意在速完或致草率刑名關係重大務須加意
詳慎以副委任至意七月疏奏完結事件得

旨嘉獎五十二年三月

萬壽聖節與

賜年老大臣宴

賚冠服等十二月誤將

特旨發遣不應援

赦之流犯常明入彙題釋放得

旨切責下部議革職五十八年卒於家年八十有七子富

明安官總督自有傳

擴爾坤 子遜扎齊

擴爾坤滿洲鑲紅旗人姓薩克達先世居那穆都

魯地

國初有葉古德者率戶口來歸編佐領使統之是為
擴爾坤祖父喜福兵部理事官崇德八年十二月
隨副都統鄂羅塞臣征黑龍江攻降圖呼爾禪城
順治三年隨都統覺羅巴哈納擊敗叛鎮賀珍於
漢中六年勦叛鎮姜瓖賊黨於寧武關及左衛被

創力戰紀功初由考滿授雲騎尉兩遇

恩詔晉三等輕車都尉後因創發卒十五年贈二等輕車

都尉以擴爾坤長子希特哈襲擴爾坤時任佐領
隨征貴州敗明桂王朱由榔之將李成蛟於涼水
井又擊走其晉王李定國於雙河口十八年希特
哈卒擴爾坤次子佛倫雅圖襲職尋亦卒康熙元
年擴爾坤襲二等輕車都尉十二年八月由護軍
叅領擢鑲紅旗蒙古副都統十二月以逆藩吳三

桂反

命駐防太原十三年正月移駐西安尋以四川告警

命擴爾坤進駐漢中六月同副都統吳國楨會總督周有

德軍於廣元接應攻保寧大軍七月叛鎮吳之茂

由昭化出犯廣元擴爾坤遣兵敗之八月賊五千

餘由廣元西南水陸兩路來犯分兵擊却之九月

擊敗刼糧賊衆於二郎關擒偽都司賀騰龍十一

月偽將軍何德成引賊四千犯廣元分兵渡河擊

却之逐北三十餘里尋以七盤朝天諸關復為賊據

詔撤廣元兵還漢中十四年七月漢中乏餉將軍錫卜臣
領軍還城固縣擴爾坤率右翼四旗兵殿後偽總
兵彭時亨等以八千餘賊據險邀阻擴爾坤擊潰
之且戰且行三晝夜次洋縣之金水河與賊七戰
皆捷諸軍前行擴爾坤仍殿後賊衆環逼中鎗力
戰歿於陣

賜祭葬如例加騎都尉又一雲騎尉合舊襲之職為三等男二十五年二月以其孫額爾白納襲甫八歲是冬殤乃以其子遜扎齊襲遜扎齊初任侍衛尋遷護軍叅領三十二年十二月擢鑲紅旗滿洲副都統三十五年

上親征噶爾丹以遜扎齊管鑲紅旗火器營協管鑲紅旗行營事五月師至克魯倫河噶爾丹竄走

命同平北將軍馬思喀追剿至巴顏烏蘭六月遷護軍統

領三十六年扈

蹕寧夏以伊拉古克三胡土克圖奔投策妄阿喇布坦

命同散秩大臣巴當阿率兵齎四十日糧追至瀚海而還

四十二年四月遷正黃旗蒙古都統四十四年九月調滿洲都統列議政大臣四十五年

命同尚書徐潮等往淮安監修河工自高家堰三壩下引水至唐漕河入寶應湖自高郵減水壩下引水從車邏中壩至串場河白駒閘入海又於文華寺開

引河及淮安城南澗河清溝引水由蝦溝口入海
共濬河十萬四千九百餘丈築隄四萬一千五百
餘丈并建閘洞閘五月竣事五十五年五月擢工
部尚書五十七年四月調戶部六十一年十一月
世宗憲皇帝御極

命協管

陵工雍正元年四月以辦理敬謹盡心

賜雲騎尉職合舊襲之三等男晉為二等男十月調工部

尚書二年十月因戶部庫虧帑二百五十餘萬兩
遜扎齊不先舉發及奉

旨察究何人侵蝕復徇情庇護

命革職分賠越三年以應賠銀十萬兩僅繳一千二百餘
兩論斬繫獄六年九月

詔八旗及各省督撫確察虧帑罪犯其父祖有偉績殊勲
及陣亡盡節者據實具奏於是鑲紅旗都統等以
遜扎齊之祖喜福父擴爾坤俱係出征傷亡入奏

命免罪釋放并免追繳八年十一月卒其舊襲男爵循例

銷去

恩加之職改二等輕車都尉以其次子瑪什泰襲

噶爾弼

噶爾弼滿洲鑲紅旗人姓納喇父額爾德赫任敬
謹莊親王尼堪府長史從王征伐著績順治十六
年署護軍統領偕安南將軍達素等勦海賊鄭成
功於廈門額爾德赫率右翼兵擒偽民安侯周序

命署鎮海將軍康熙元年還京尋卒噶爾弼初任前鋒叅
領康熙四十四年授正黃旗蒙古副都統四十五
年調正黃旗滿洲副都統五十一年遷正紅旗護
軍統領五十七年調鑲紅旗護軍統領五十八年
準噶爾賊酋策凌敦多卜三濟等襲據西藏

命噶爾弼馳赴四川協理總督年羹堯軍務噶爾弼諜知
策凌敦多卜與三濟不睦疏請遣諭策凌敦多卜
降以分賊勢

詔可五十九年二月平逆將軍宗室延信奉

命由青海往定西藏

詔授噶爾弼為定西將軍偕都統武格率四川雲南兵由

拉里協勦時策凌敦多卜自拒延信軍而遣其黨

春丕勒宰桑以兵二千六百由章米爾戎來拒我

軍乘其不備取道莫珠貢喀集皮船渡河直趨西

藏八月克之噶爾弼集藏地大小第巴頭目及各

寺番僧等宣示

皇仁封閉達喇喇倉庫遣兵守隘截準噶爾糧道擒斬
策凌敦多卜所授總管喇嘛五人策凌敦多卜等
為延信所擊大敗遁西藏平捷

聞

諭曰噶爾弼等遵朕指授率領官兵歷從古用兵未到之
絕域各加奮勵克取藏地撫綏唐古忒人民甚屬可嘉
凱旋之日著從優議敘是年延信留駐藏六十年四月
以病

召還

命噶爾弼往代仍佩定西將軍印閏六月授鑲藍旗蒙古

都統九月至瀘定橋託病不行年羹堯以

聞下部議革職尋因來京逗遛擬斬雍正元年六月

詔貫其罪

賜都統銜赴軍營効力七月署固原提督二年五月署布

隆吉爾副將軍十一月授鑲紅旗漢軍都統三年

九月調鑲藍旗滿洲都統兼右翼前鋒統領十一

月擢奉天將軍四年奏言臣父額爾德赫數從征
有功因任長史未邀議敘懇

恩賜謚奉

旨致祭一次謚果毅五年正月疏言奉天金銀銅鉛等礦
雖久禁開採而竊掘者尚多利之所在聚集多人
恐其中潛藏匪類致生事端除孟犀湖等處所產
鐵為居民犁具所必需無須禁止外請將遼陽屬
之黃波羅峪開元屬之打金廠等處均照錦州大

悲嶺例永禁開採以靖地方疏下部議如所請先是

盛京戶部員外郎滿達禮等侵用買米帑銀為侍郎王朝恩所劾

諭曰噶爾弼係赦罪擢用之人理宜稽察積弊整頓陋習有應奏聞之事即行奏聞此等情弊伊如云不知則是於地方之事全不留心訪察負朕任用之恩如云知而不叅則徇情隱匿可乎著明白回奏二月噶爾弼以失

察請議處

詔下部議會噶爾弼卒免議

遜柱

遜柱滿洲鑲紅旗人姓棟鄂曾祖郎色

太祖高皇帝時偕其兄郎格率瓦爾哈什所屬來歸祖阿爾泰任護軍叅領順治元年隨睿親王多爾袞入山海關擊敗流賊李自成兵追至望都縣敕功授雲騎尉世職遜柱於康熙八年補吏科筆帖式三

十二年授工部主事三十四年遷戶部員外郎三十七年遷本部郎中尋調緞疋庫四十二年授監察御史四十六年遷翰林院侍講學士仍兼御史事明年授內閣學士四十八年奉

命祀江瀆明年遷

盛京工部侍郎五十年調吏部左侍郎五十二年奉命祀東嶽五十六年擢兵部尚書五十九年三月疏言

皇上勤求治理加意人才武臣推用時自提鎮以及千總

必

親考其騎射驗其年力如此其重也兵部向有武舉武生
官員子弟効勞一途三年役滿考試弓馬分別一
二等以守備千總用定例遵行已久但人廣銓滯
每逢月選効勞出身者多係弓馬生疎人才不及
則裁汰不可不嚴也請於差官六十名裁二十名
站堂辦事三十名裁四名停用武生官員子弟專
取武舉武進士願効勞者其宗人府鑒儀衛兵科

効勞之人一體取用武舉三年役滿內大臣會同
兵部嚴加考試武進士頭等以營守備用二等以
衛守備用武舉頭等亦以營守備用二等以守禦
所千總用弓馬生疎人才不及者不准推用

詔如所請六十年

命兼吏部尚書六十一年十一月

世宗憲皇帝御極充

經筵講官雍正元年十月

賜老成戎府扁額二年十月疏言國家設官分職一部之事分寄數司司無大小事有繁簡向來滿司員由堂官酌派惟漢司員係指缺補授竊思人才不一或才長而事簡則不得展其才或才短而事繁則致遲悞臣愚請漢司員指缺補授後堂官試看一二月如其人才能與指補之司相宜無庸置議倘才與缺不相宜奏請引

見調補庶能員得展其長即中才亦可循分供職下九卿

議從之三年六月充

實錄館副總裁四年二月調吏部尚書仍兼兵部事七月
命專理兵部事五年正月署大學士九月授文淵閣大學
士兼兵部尚書先是遜柱曾受檢討沈竹原任道
石文彬私餽應追入官逾限未完部議奪俸展限
七年十一月

諭曰遜柱雖素餐多年尚無大過且年已八旬

先帝舊臣在朝者甚少伊應追銀兩俱豁免停俸案件亦

著開復以昭優恤老臣至意九年疏陳兵部事宜六款
一各司案件例有專責胥吏以上皆有當盡之職
乃或因案涉繁劇或因事稍勞苦遂巧為推卸諉
之他司甚至推之別部往返遷延每至遲誤臣等
嚴加戒飭倘有漫不悛改仍蹈故轍者叅處一外
省暨各部咨行事件例皆按日登記然輕重緩急
難以一律其稍關緊要者分別先後限辦乃有故
意推延或稱無例可查或稱舊案未得不思

朝廷用人惟材原責以隨宜辦理若止據成例舊案
只一書吏可查何須司員何須堂官請嚴為條約
務令司員竭其才力如事涉疑難許呈堂酌定倘
有舛錯臣等身任其責若推諉遲誤者照溺職例
議處一議敘上闕

國典奉

命之日即應辦理乃展轉支吾如一案議敘人員多至百
十人中有一二人註冊未明一二字重複錯誤藉

端駁詰延遲日久弊竇百出請嗣後議敘案件隨到隨辦即一二人當駁查不得因一二人稽遲至一二字重複錯誤詳查原案立可分晰而不肖官吏往往藉此需索臣等現行嚴禁若仍有此弊將該管官吏治罪一軍功議敘所關尤重介冑之士効命疆場非尋常勞績可比查從前敘功案內力戰一次予一功牌力戰數次亦止予一功牌所司以為定例是一經立功之人不得再與議敘甚非

國家勸功行賞之意雖成例亦當更定請查明前
案盡予改正一武職議處盜案疎防往往反覆駁
詰如初叅疎防之案則駁以或係疎防或別有隱
匿及該處以實無隱匿報又稱確盜窩主應俟刑
部審結再議查刑部盜案有遲至數年未結者若
必俟結案定議則應開復人員其中雖有可用之
才該上司以叅案未結例不陞補而應行議處者
轉得將降級罰俸之處遷延歲月徒滋弊端請疎

防案件即照該督撫提督所報定議仍咨刑部如
審結後有隱匿捏報等情將該員及查報不實之
上司叅處庶事案隨到隨結不至壅滯於律法亦
無疎縱一胥吏之設只令收送文簿此外原無執
掌乃猾吏舞文或將新到文卷故意延捱舊存案
牘擅自隱匿在堂司官以為稍遲一二日偶遺一
二件未必遽有大弊然推陞之案稍差一二日其
得缺先後各異承審之案稍遺一二件其情罪輕

重迥別請嚴為條禁其遲誤一二日遺漏一二件者量行懲戒遲誤至五日以上遺漏至五件以上者分別輕重杖責若別有行私索詐等弊送刑部定擬並如議行十年三月

特諭遜柱年逾八旬不必兼兵部十一年七月

命以原官致仕八月卒年八十有四得

旨遜柱醇厚和平服官多年且年逾八旬應給恩典察例

具奏尋

賜祭葬如例

錫勒達

錫勒達滿洲鑲紅旗人先世居棟鄂以地為姓曾

祖對齊巴顏於

太祖高皇帝時率屬來歸父格哩官兵部郎中兼佐領
世祖章皇帝順治十五年從征雲南卒於軍

聖祖仁皇帝康熙十一年錫勒達由太常寺贊禮郎兼管

佐領事十六年授太常寺卿二十三年遷左副都

御史尋擢內閣學士充

經筵講官二十四年正月

上祈穀禮成

顧錫勒達及太常寺卿格斯特曰前見

太廟致祭時執事官捧福胙由神位前趨走於尊

祖敬

宗之意未協爾等曾稽舊例否錫勒達對曰太常寺紀書

禮部會典俱未載及

上復以贊禮郎唱亞獻為次獻義亦與漢字不符

命太常寺與內閣禮部集議改定執事各官從殿外側旁
趨走改唱次獻為亞獻二十六年擢禮部左侍郎
兼管太常寺事三十年與內大臣明珠等奉

命頒賞喀爾喀部歸降人衆三十三年禮部奏祭

奉先殿儀注誤設皇太子拜褥於檻內下吏部議處尚書

薩穆哈革職錫勒達得

旨寬免三十五年

上親統大軍征噶爾丹錫勒達扈從與學士三寶隨皇三子允祉等經理鑲紅旗大營軍務三十六年五月擢都察院左都御史九月遷兵部尚書三十八年七月奉

命赴陝西署川陝總督十一月調禮部尚書三十九年十月調吏部尚書仍並署總督事時烏思藏喇嘛擅殺內地土官錫勒達疏請

敕令喇嘛第巴拘犯解訊并請移化林營兵駐打箭爐以

資彈壓得

旨先行既而逆番刦掠官兵阻絕橋道錫勒達密陳進勦

機宜

上命侍郎滿丕率荊州駐防官兵會提督唐希順相機勦

撫至是錫勒達奏請親往會勦

上以秦地緊要需人鎮撫

諭止之尋滿丕等以捷

聞初錫勒達之未至陝西也四川巡撫于養志提督岳昇

龍互訐賊款

遣侍郎洛察布泰往勘養志昇龍並應革職

命未下昇龍復以養志交結藏番密奏

上命錫勒達覆審得養志刪改昇龍咨報文移不據實奏
致逆番侵占內地戕害土官狀罪應斬昇龍革職
無餘罪

上以洛察布泰前此察審未明並降用尋復昇龍原官四
十年十月錫勒達赴

台還京任部事明年御史王度昭疏劾尚書李振裕勒取
屬員禮物部議振裕收屬員賀壽圍屏屬實應革

職

諭曰若果勒取禮物其罪寧止革職若收一屏豈宜以細
故輕黜大臣凡稱清吏豈皆一物不受錫勒達自陝西
來曾奏藩庫羨餘歲分萬金今仍為吏部尚書若以受
屏議革如伊歲受萬金者更以何罪處之下九卿等會
訊振裕止收一屏亦非勒索度昭指實一事均免

議尋

命錫勒達以吏部尚書銜管理部事四十二年八月鎮算
紅苗作亂奉

勅偕副都統圖斯海徐九如率前鋒四十名調荊州及廣
西貴州湖南兵撫勦

上指授方畧并

諭令會同荊州副都統珠滿湖廣提督俞益謨協力酌籌
十一月錫勒達至荊州趨鎮算先遣將士赴苗寨

宣

諭德威苗人難警摘環呈繳軍械歸誠者三百一寨惟天
星寨龍椒洞排六梁等十五寨逆苗並恃險負隅
觀望不至錫勒達乃與圖思海等議令貴州提督
李芳述進取糯塘山上葫蘆下葫蘆兜沙等寨廣
西提督張旺進取馬鞍打郎老枉山等寨鎮草總
兵雷如進取毛都塘老家寨兩頭羊湄亮七都樹
等寨而自與珠滿俞益謨率兵由報木營抵龍椒

洞分兵五路預扼遁竄要隘攻滅天星寨并力搜
勦排六梁箐斬殪無算李芳述張旺雷如等並分
率所部攀藤入箐熏崗綠崖奮勇撲勦前後斬賊
千餘級餘悉納降收獲牛馬軍械均充賞賚明年
正月與總督俞成龍巡撫趙申喬等定議安立營
汛增設鎮竄道乾州同知鳳凰營通判各一員為
善後計三月還京復

命繪圖呈

覽報聞仍奉

命兼管太常寺事四十五年十二月卒年五十有九

賜祭如例子六人次子烏禮布官至黑龍江將軍第五子

世貴官至內閣學士第六子拉布敦官至左都御

史贈壯果伯祀雙忠祠乾隆十五年

詔以其子及同旗兄弟子孫並改隸正黃旗拉布敦別

有傳

阿爾護

阿爾護滿洲鑲紅旗人姓富察世居輝發地父鄂拜

國初來歸管佐領

世祖章皇帝順治元年隨大軍入山海關擊走流賊李自成三年隨貝勒博洛征福建明年敘功予世職一等輕車都尉仕至鑲紅旗蒙古副都統第三子幹爾達襲世職阿爾護其長子也初任長史康熙十

三年九月

命署副都統同振武將軍坤巴圖魯率兵之河南駐防汝
寧十二月賊帥王屏藩叛鎮吳之茂由四川窺陝
西提督王輔臣叛應之阿爾護同坤巴圖魯率兵
赴西安十四年二月率兵五百守寶雞五月賊兵
七百餘由鳳縣犯棋盤宮阿爾護遣兵擊敗之追
至天王村陣斬偽都司李玉國等四百餘級生擒
偽總兵劉偶三遂招撫歸川十二堡偽叅將普國
祥等七員兵一千餘名降八月

詔將軍佛尼勒分兵六百令阿爾護統轄嚴防棧道諸險
要九月同副都統鄂泰分兵三隊擊敗偽總兵彭
時亨等於棧道口仰天池賊兵墜崖死者無算復
有偽總兵李姓冉姓引賊千餘由棧道螞蟻河出
口立三營於九龍山阿爾護率兵八百星夜進攻
大殪之生擒十七人獲器械縱釋賊營婦女二十
九口歸其家十月偽總兵石存禮黑邦俊楊天保
徐崇炳任德旺等率兵八千出棧道據益門鎮口

分七營覷寶雞以援平涼阿爾護與鄂泰曉諭諸
軍此棧道隘口營壘能攻克者與克州城一例論
功遂分兵一由西山岡上一由東山岡上一由中
路直指賊壘鼓勇奮進自巳至未盡破賊七營追
奔十五里射死偽總兵一擒斬偽官兵二百餘獲
木印二偽劄二百馬匹旗幟盔甲器械無算又敗
益門鎮賊兵四千於仰天池山下及益門鎮東邵
家山黃兒子溝沈家坡等處尋遇偽總兵四人偽

副將六人率賊五千據黃兒山拒戰擊却之賊不敢出棧道十五年二月以軍前効力屢次殺賊立功實授鑲紅旗蒙古副都統是年大軍克平涼阿爾護隨將軍穆占移師湖廣十六年擊吳逆偽將軍吳國貴於長沙力戰歿於陣十七年九月

賜祭葬如例謚敏壯贈三等輕車都尉世職以其子博禮襲

世宗憲皇帝雍正二年以阿爾護入祀昭忠祠

穆成額

穆成額滿洲鑲紅旗人姓那穆都魯西安將軍富喀禪之子也襲父三等子世爵康熙十三年二月耿精忠叛應吳三桂江西寧都廣信各屬騷動

聖祖仁皇帝命康親王傑書為大將軍往征福建復

命定南將軍希爾根副將軍哈勒哈齊平定江西六月令穆成額署副都統事與副都統倭赫率大兵赴希爾根軍前未至而精忠陷石城犯寧都穆成額奉

諭兼程速赴江西希爾根等方統兵援撫州穆成額遂分兵守南昌九月吳三桂自長沙遣賊將犯袁州

詔穆成額率所部往與總兵趙應奎併力固守以俟大軍會剿

遣將軍尼雅翰率駐防江寧兵及副都統碩塔等援之十月偽總兵黃乃忠等合賊衆數萬自萍鄉來犯袁州穆成額與副都統幹都海倭赫等敗賊於西村斬殺萬餘復登山奮擊賊大衄追斬五千餘級復

與趙應奎分兵二路疾趨萬載縣環城攻擊賊出拒敵奮擊敗之陣斬賊渠邱以祥擒偽官童聖功收獲俘殪無算復其城十一月偽總兵張泰竊據安福縣穆成額偕叅領色埒等分路進剿殺賊五千餘復安福縣時耿逆未平叛賊劉進忠等陰連鄭錦寇瀕海郡邑平南王尚可喜與總兵黃芳泰連疏請發大兵至潮州

上命尼雅翰與鎮南將軍侍郎舒恕率兵赴廣東穆成額

叅贊軍務十四年大兵恢復南雄始興守備李光明通賊陷城穆成額與總兵張星耀統衆攻勦陣斬賊將郭梓擒光明及所署偽官等復始興明年五月尚之信叛韶州南雄應之穆成額隨舒恕等退保南安贛州十月與江西巡撫佟國楨合兵勦滅贛州附近諸賊復萬安縣復與副都統額赫訥等屢敗逆賊於南康縣之固鎮堡十六年三月

詔舒恕等鎮守贛州而以副都統莽吉圖為鎮南將軍征

廣東仍

敕穆成額與額赫訥叅贊軍務駐兵韶州莽吉圖聞賊黨
劉進忠寇潮州乃留穆成額守韶而自率兵赴廣
東七月三桂遣賊犯韶州穆成額與副都統赫呼
布督兵急擊却之及廣韶悉定仍與莽吉圖進兵
廣西十七年三月吳逆偽將分犯潯梧桂林平樂
等郡有

旨諭莽吉圖鎮梧州令穆成額與將軍額楚都統勒貝巡

撫傅宏烈統兵協勦七月兵至鬱林戰失利退保
藤縣十二月藤縣失守

上復遣平南王尚之信及將軍舒恕率師赴援賊乃遁走
二十二年議政王大臣等以穆成額藤縣失機不
能禦賊且不收陣亡士卒骸骨應褫職籍沒編入
內務府佐領得

旨免其編隸尋以其弟新柱襲世爵

欽定八旗通志卷一百七十三

欽定四庫全書

欽定八旗通志卷一百七十四

人物志五十四

大臣傳四十

滿洲鑲紅旗四
倫特 欽拜

音泰 溫達
德成 常德壽

杭額

奕祿 溫福

音泰

音泰滿洲鑲紅旗人姓瓜勒佳初為西安駐防兵
康熙十三年隨副都統佛尼勒征吳三桂叛黨譚

宏吳之茂王屏藩等由漢中進師克陽平朝天等
關駐守梅嶺關射殪賊之毀木寨者追斬其渠一
人賊糾衆乘夜劫營音泰力禦中鳥鎗折齒得上
等賞十四年佛尼勒勦叛鎮王輔臣於秦州我軍
臨壕列圍賊突騎出犯音泰射殪三人賊駭遁復
勦西和縣屢敗之茂等於鹽關岐山堡十七年隨
征寶雞敗賊益門鎮十九年進征四川克保寧叙
州擊賊將胡國柱等在事有功二十七年授驍騎

校三十四年遷防禦明年三月署叅領隨西安將軍博霽率兵往會撫遠大將軍費揚古征噶爾丹出西路五月

上由中路親征至克魯倫河而西路積雨糧運遲滯又賊屬預焚有草之地我軍迂道秣馬音泰言於博霽曰

聖駕親臨擊賊我等宜倍道前進乃急趨昭莫多遇賊交戰音泰射却賊數人大軍並進噶爾丹敗遁敘功

予雲騎尉世職四十一年遷佐領明年

上幸西安音泰以校射記名得與

賜宴尋授協領四十三年擢西安副都統明年授西寧總

兵官

上稔知其貧

特詔陝西督撫大臣助其練兵犒賞之費四十六年

諭曰音泰材健人優從軍十數年身經二十餘戰常中鎗

折齒益復奮勇嫻於馬步射兼通漢文自任總兵以來

邊外蒙古及內地人民交口稱譽且居西土久熟習邊事著陞授甘肅提督四十八年遷川陝總督入

覲

賜孔雀翎及冠服鞍馬並

御書攬轡澄清匾額

賜之四十九年幹偉番蠻羅都等刦掠寧番衛冕山營遊

擊周玉麟遇害提督岳昇龍疏請往勦

上命四川巡撫年羹堯偕往羹堯至寧番衛昇龍已擒獲

羅都等三人付羹堯鞫詰既定讞羹堯遂先還昇
龍同建昌總兵郝宏勲由冕山至會鹽招降番蠻
諸酋願率衆十餘萬貢納糧馬音泰疏請即以降
酋為土司分隸其衆因劾羹堯不偕往招撫違

旨先還羹堯革職留任帶罪効力未幾昇龍以疾解任羹
堯知其曾向前任巡撫能泰布政使卞永式借帑
金萬兩尚未歸款欲率屬捐俸代償音泰不從羹
堯遂入告

上以昇龍効力多年允堯堯代償

諭音泰宜與巡撫和衷尋

諭大學士曰音泰潔清自持不徇情面乃實心任事人也
五十一年左都御史趙申喬侍郎鳴敏圖往勘慶
陽知府陳宏道西寧知州姚宏烈互訐虧帑婪賄
款蹟因得原任巡撫齊世武布政使伍實阿彌達
分取火耗銀各數千兩事按律擬罪以音泰曾檄
示州縣官徵收錢糧輕減火耗不盡行革除議褫

職

上曰音泰居官甚優寬免之會奉

詔申禁遊民越境令嚴劾縱容之文武官於是邠州諸處
拘繫者四十餘案每案十數人或至四十餘人音
泰疏言訊鞫各案皆藉伎業營生無兇惡情狀可
否解回原籍收管如再縱出境議處所司

上曰遊民越境所以應嚴禁者恐聚衆剽掠漸致難圖明
季李自成即其驗也今閱所奏各案俱以伎業取錢餬

口非兇惡可比應即省釋槩免官員處分是年九月自
陳病痲不能理事

上曰朕前幸西安灼知音泰義勇洊擢至總督正已率屬
寬嚴並用軍民無不感戴朕甚愛惜之可令在任調攝
五十二年四月復以疾劇乞罷

許解任還京給第宅田畝以旌其廉又嘗

諭廷臣曰音泰朕所特用之人初用時人不知其善後乃
稱朕有知人之明五十三年四月卒年六十有三

賜祭葬如典禮謚清端其雲騎尉世職例襲一次

特詔世襲罔替子瑚什巴襲

溫達

溫達滿洲鑲紅旗人姓費莫由筆帖式授都察院
都事遷戶部員外郎康熙十九年授陝西道御史
二十五年遷吏科給事中三十三年兼管佐領三
十四年授兵部督捕理事官三十五年二月

聖祖仁皇帝親征噶爾丹溫達奉

命隨皇七子允祐都統都斯噶爾等管理鑲黃旗大營明

年冬擢內閣學士三十八年授戶部侍郎四十年

三月

命往山陝察驗驛站馬匹還奏由大同府至保德州花馬池及肅州涼州西寧莊浪蘭州等處視瞻肥善馳之馬悉加烙印疲瘦者通飭換補并牒巡撫嚴劾官屬之餵飼失宜及侵蝕滋弊者得

旨報聞十月列議政大臣十一月雲貴總督巴錫疏劾遊

擊高鑑審理訟案捏飾并劾提督李芳述牒咨徇
隱李芳述亦劾巴錫置咨弗覆未會稿遽題有違
成例部議令巡撫察審

上曰李芳述在西寧時甚有聲名此事似曲在總督巡撫
未必從公著遣侍郎溫達前往察審明年二月調吏部
侍郎尋還奏高鑑罪應徒巴錫應降級李芳述應
罰俸事詳李芳述傳九月擢左都御史四十二年
復奉

命往貴州勸威寧總兵孟大志尅減兵餼事得實論罪如

律四十三年遷工部尚書四十五年三月充

經筵講官十月調吏部尚書

諭曰朕因吏部事務緊要特簡任爾凡銓選已有定例當
遵例而行其介在兩可者時或滋弊宜加意體察四十

六年十二月授文華殿大學士時纂修

三朝國史

政治典訓

平定朔漠方畧

大清一統志明史並充總裁官五十年十月

命八旗及部院大臣奏舉篤行孝義之人因

諭曰孝者百行之首爾等不可謂無由灼知如大學士溫達尚書穆和倫富寧安之孝不但衆人俱知即朕亦深知之也五十二年

御製七言律詩以

賜有自少存心敦孝友之句五十三年正月乞休得

旨卿者舊老臣才品素著自簡任機務以來恪慎和平實
心盡職勤勞歲久倚毘正殷覽奏以衰老乞休情詞懇
切准以原官致仕十二月

諭曰溫達雖年老告退尚自康健著仍任大學士五十四
年四月疾

遣太醫診視

賜藥餌五月卒遺疏上得

旨溫達久任機務寬厚簡靜懋著勤勞予告之後朕眷注

猶殷仍起辦事正期長享遐齡以承寵渥遽爾病逝深切軫悼下部議卹

命皇子及大臣二員侍衛二十員奠茶酒

賜祭葬如典禮謚文簡

額倫特

額倫特滿洲鑲紅旗人姓科奇哩西安將軍佛尼勒子也康熙二十一年佛尼勒卒於官四川總督哈占奏言佛尼勒家貧不能還京請以其子額倫

特留西安効用部議不許得

旨自逆賊擾亂四川以來佛尼勒勤勞軍事其子額倫特
准留西安補用二十三年補西安駐防佐領三十年厄
魯特部巴圖爾額爾克濟農剗掠喀爾喀札薩克
丹津部衆

上遣將軍尼雅翰率師往宣

詔旨令還所掠人畜率部衆徙居察哈爾地巴圖爾額爾
克濟農不從以其衆奔竄額倫特隨大軍追之不

及擒獲蒙古二人復隨將軍郎坦赴克錫圖穆稜
出嘉峪關追獲蒙古七人三十五年

上親征噶爾丹額倫特隨大將軍費揚古由西路進大敗
賊衆於昭莫多以功予雲騎尉世職擢西安協領
四十二年

駕幸西安

閱武設宴

特召額倫特近

御座前

親賜之飲

諭曰爾父宣力行間爾亦由兵丁効力以至協領故親賜

飲以示異於衆尋遷西安副都統調荊州副都統

四十九年

特授湖廣提督

上復念額倫特奉職清貧

詔湖廣總督巡撫等量為資助五十二年川陝總督音泰

以病乞解任

上嘉其清潔自持令在任調治久而未愈乃以湖廣總督

鄂海調補川陝而授額倫特為湖廣總督

諭大學士等曰額倫特音泰皆朕特用之人也初用時人不知其善後乃稱朕有知人之明時江蘇巡撫張伯行亦以廩卽著

諭廷臣曰天下督撫惟額倫特與張伯行操守最優耳旋奉

命與戶部郎中幹琿泰履勘湖南諸州縣廢壤四萬六千一百餘頃疏請聽民墾闢酌於六年後科以下則下部議行五十四年山西太原知府趙鳳詔巧立稅規貪墨不職額倫特奉

詔往勘得實疏言枉法受贓例應縲首鳳詔為左都御史趙申喬之子受恩深重法應加等擬監候斬罪九卿議改立決鳳詔遂伏誅時厄魯特策妄阿拉布坦率賊衆犯哈密

上遣尚書富寧安等調兵進勦尋駐防哈密遊擊潘至善等擊敗賊衆策妄阿拉布坦遁走於是領兵大臣等定議先取烏梁海土魯番諸部而後進征厄魯特五十五年閏三月

命額倫特署西安將軍事同總督鄂海協理軍饒十月策妄阿拉布坦驅賊衆由噶順汎界山後過沙拉執青海台吉羅卜藏丹濟布而遁

上慮賊酋由噶斯口復犯青海乃

詔額倫特統重兵移駐西寧為青海諸部應援五十六年

三月奉

諭往巴里坤與將軍富寧安會議襲擊準噶爾邊界及留

後接應事宜十月富寧安以策妄阿拉布坦令宰

桑領賊衆由阿哩克路迤西潛去入告額倫特復

奉

勅回駐西寧

上遣侍衛諾爾布等至青海令諸台吉協力勦禦且

諭曰將軍額倫特才畧過人凡有聞見其同心議行既而
青海親王羅卜藏丹津以策妄阿拉布坦遣其屬
策凌敦多布往掠西藏欲滅拉藏汗疏報額倫特
奉

命與內大臣策旺諾爾布統兵駐守青海防歸途剽掠
上復勅西寧松潘各路備兵為拉藏汗救援

詔額倫特與青海王台吉等策議屯軍形勝之地額倫特
疏言西寧抵藏之路有三惟庫庫賽爾嶺及拜都

嶺二路較珠爾肯一路寬廣易行請與侍衛色稜
分道進剿若賊衆一路拒敵則我師別有間道可
以直入藏地攻其後尾若賊分路拒我其勢既分
亦無難剪滅

上令額倫特與策旺諾爾布定議以行五十七年四月偵
知賊衆戕殺拉藏汗於布達拉城執汗子蘇爾扎
而據其地西藏人來歸者額倫特並為安撫六月
額倫特與侍衛色稜分路進師額倫特率大軍自

穆魯斯烏蘇啟行至圖勒哈圖以皮船濟因取道
庫庫賽爾嶺七月抵齊諾郭勒賊乘夜侵我軍壘
遣遊擊王汝載等擊敗之次日賊復從東南分路
來犯額倫特親率弁兵緣山接戰自寅至巳賊潰
遁追擊十餘里多所斬獲得

旨額倫特領兵頗少徑抵絕域奮勇直前建立膚功非尋
常軍功可比事定後從優議叙尋聞賊酋托布齊等以
衆數千潛由喀喇烏蘇來拒我師額倫特率所部

疾趨欲先渡河扼朗拉嶺之險禦賊比至喀喇烏
蘇侍衛色稜等亦以兵來會併力進擊屢敗賊衆
賊復聚衆數萬環集來攻額倫特領兵奮擊身被
重創督戰益力與賊相持月餘至九月復厲兵進
戰射殪賊衆無算矢盡持刀奮呼斫賊賊益兵圍
之額倫特力戰歿於陣五十八年櫬還京

命親王及貝勒貝子公等迎至城外復

遣內大臣侍衛至其家奠茶雍正元年

世宗憲皇帝特命敘功予三等輕車都尉世職

賜祭葬如典禮諡忠勇入祀昭忠祠子愛山襲職

欽拜

欽拜滿洲鑲紅旗人姓瓜勒佳曾祖羅璧

國初隨兄勞薩來歸由佐領從征有功授一等輕車

都尉以兼襲兄子程尼所得一等伯兼一雲騎尉

併為二等公兼議政大臣卒子順保襲一等伯兼

一雲騎尉卒子奇通阿襲因病告休子即欽拜於

康熙三十四年襲四十六年授頭等侍衛尋改冠軍使五十四年十月授散秩大臣十二月授鑲藍旗蒙古副都統五十七年赴西寧軍營雍正元年六月還京仍為散秩大臣十月補正黃旗蒙古副都統十一月授兵部侍郎三年疏言駙站備緊要事今大小武職印

勅俱由兵部派筆帖式領催由駙馳送查職任有輕重之分駙馬有可用不可用之別請將叅將以下停送

由提塘轉發其將軍提鎮副將有職掌大員仍舊
例部議如所請四年以前引失儀且巧辯革職發
軍臺効力九年正月

召還復原職七月率右衛兵赴北路

命叅贊撫遠大將軍馬爾賽軍務授內大臣十年二月順
承郡王錫保奏欽拜實心辦事善于約束請調赴
察罕廋爾軍營

諭曰馬爾賽辦事甚不愜朕意扎克拜達里克軍營全賴

欽拜一人著仍留駐彼地八月準噶爾賊犯北路為額駙策凌等擊敗西遁時經畧大學士鄂爾泰在肅州派兵赴哀塔瑪哈戈壁堵剿

諭曰欽拜等擁兵萬餘駐守扎克拜達里克遇準噶爾窮寇徒手奔逸並不追擊怯懦不堪著傳旨詢問尋欽拜奏言賊由推河逃遁臣等願領兵往追馬爾賽聽李秋固守城池之說不允再三請往馬爾賽方領兵起程及抵博木喀喇地方僅選兵七百令臣前

進馬爾賽竟還扎克拜達里克疏入

上以馬爾賽負恩縱寇

特命鞠實正法李杕擬斬如律十月署綏遠將軍十一年

正月署建勲將軍時平郡王福彭為定邊大將軍

詔與欽拜等酌定方畧公同議行十二年協辦烏里雅蘇

台糧馬乾隆元年撤兵還京仍為內大臣二年署

領侍衛內大臣三年授青州將軍十年還京仍在

內大臣上行走十二年卒

遣散秩大臣帶領侍衛等往奠茶酒並

賞治喪銀五百兩

賜祭葬如例謚肅敏欽拜無嗣從子固寧阿襲二等子

爵

德成

德成滿洲鑲紅旗人姓兆佳康熙四十三年由筆帖式授禮部主事五十六年兼副叅領五十七年遷工部員外郎雍正元年兼佐領尋遷本部郎中

三年二月遷叅領八月擢鑲紅旗滿洲副都統七年四月遷正藍旗護軍統領七月疏言旗人入學後許考試筆帖式取中先以無品級筆帖式用陞任後方與有品級筆帖式較俸推陞竊思文生員係正途與舉人僅隔一階舉人授職七品請嗣後文生員考補筆帖式者降一等與監生一體授八品筆帖式下部議行八月遷正紅旗滿洲都統兼管火器營事九月疏言臣奉

旨監試八旗鄉試生監騎射八旗咨送有名冊遺漏臨時
方咨者有已行文而禮部遺漏補送者且名姓重
誤甚多事關大典考試既有定期咨送當有定限
請嗣後禮部於考期四個月前行知八旗該旗將
姓名年貌造冊於兩月前送部該部即會同兵部
將旗分姓名年貌對清如該旗逾限禮部題叅部
中舛漏監試大臣題叅又言包衣佐領下莊頭子
弟居住屯鄉臨考所派包衣叅領不能遍識難免

頂替請嗣後每旗派叅領一員每叅領下派章京
一員本佐領派領催等帶送應考人向叅領等識
驗公同送考騎射并送入場倘推諉不到禮部題
叅又言例載十五歲以下應考童子亦令考試騎
射但年未及壯力不勝馬者甚多請停馬箭祇令
考試步箭俱議如所請九年正月奉

命往西寧辦理青海事務及噶斯軍需十年正月卒於西
寧

賜祭葬如例謚勤僖

常德壽

常德壽滿洲鑲紅旗人姓瓜勒佳康熙五十三年
由刑部筆帖式遷堂主事五十九年遷戶部員外
郎雍正元年授直隸巡道二年遷江西布政使抵
任嚴查倉糧虛報數目及地丁銀那新掩舊之弊
有虧缺者勒補三年調雲南布政使四年疏言雲
南距京八千餘里教職缺出咨部銓補必須半年

外文憑到省又須轉行地方官具文送撫臣處考驗倘有荒疎老邁者勢必繳憑另選經年懸缺仰懇

皇上勅諭吏部將滇省應選教職人員挨次截取二十員發滇令撫臣預先考定等第註冊送部缺出即將考定之員依次委署咨請實授前項將屆補完續請截發如此則缺不久懸得

旨此奏甚是下部議行五年擢戶部左侍郎六年薊州水

利營田効力官梁文中毀苗殃民擅更成法

特遣常德壽往查治文中罪如律七年

上以西路軍需緊要寧遠大將軍岳鍾琪領兵出口署川
陝總督查郎阿陝西巡撫武格新任未諳

命兵部尚書查弼納總理稽查常德壽同常賚協理之各
給印信乘傳八年六月

諭大學士曰查弼納常德壽等此次查辦軍需甚屬可嘉
著交部從優議敘尋議加二級七月遵

旨往甘州涼州辦理大兵駐歇一年口糧行至平番縣之

紅城堡卒

予祭葬如例

杭奕祿

杭奕祿滿洲鑲紅旗人姓完顏由閒散考授中書

雍正元年正月授額外員外郎三月補監察御史

十月遷光祿寺少卿二年十一月充繙譯鄉試副

考官三年正月遷光祿寺卿時奉

旨蘇州松江長蘓正項錢糧四十五萬杭奕祿疏言

聖主施千古未有之殊恩蠲錢糧至四十五萬臣思蠲免之數按田均算其中有田者雖多無田而佃種人田者亦不少有田納賦既邀蠲免定額佃人納租業主亦宜酌減常式俾貧富均沾實惠得

旨此奏甚公下九卿詹事科道議尋議減十分之三如業戶免額一錢則佃戶減租米三升

詔如議速行五月擢左副都御史仍兼管光祿寺事五年

九月以安南國定界事

命偕內閣學士任蘭枝往

諭國王黎維禔先是原任雲貴總督高其倬查奏安南國
界有內地舊境百二十里應加清理於賭咒河立
界國王具疏陳辯

上命總督鄂爾泰再行確查給還八十里於鉛廠山下小
河內四十里立界國王復疏辯

勅該國王不必以從前侵佔內地為嫌中心疑懼拳拳申

辯至是復

命杭奕祿等往

諭未至國王奉

勅悔罪上表謝鄂爾泰以

聞六年正月

詔以鄂爾泰所查鉛廠山下四十里地畀安南並

勅諭令杭奕祿等齎往宣讀

賜敕曰朕前令守土各官清立疆界原屬行之內地未令

清查及於安南也督臣高其倬以職任封疆詳考志書兼訪輿論知開化府與安南分界處當在逢春里之賭咒河於是一面設汛一面奏聞比因該國王陳奏朕特降旨令撤汛另議立界又恐高其倬固執已見復命接任總督鄂爾泰秉公辦理鄂爾泰體朕懷遠之心定界於鉛礮山下小河較舊界已縮減八十里誠為仁至義盡此皆地方大臣經理疆界職分所當為朕統馭寰區凡屬臣服之邦皆隸版籍安南既列藩封尺地莫非吾

土何必較論此區區四十里之地若該國王以至情懇求朕亦何難開恩賜與祇以兩督臣定界時該國王激切奏請過於舛望種種陳訴甚為不恭該國王既失事上之道朕亦無從施惠下之仁此天地之常經上下之定體乃王自取非朕初心也頃鄂爾泰將該國王上年十二月內本章呈奏知該國王深感朝廷之仁自悔從前執迷之誤踴躍拜命詞意虔恭朕覽閱之餘甚為嘉悅在王既知盡禮在朕便可加恩況此四十里之地在

雲南為朕之內地在安南仍為朕之外藩一毫無所分別著將此地仍賞賜該國王世守之並遣大臣前往宣諭該國王其知朕意十月杭奕祿等還京奏言臣等於三月自滇起程取道廣西五月至鎮南關安南陪臣范謙益等六員叩迎關門外六月抵貂瑤營國王復遣陪臣迎勞且請儀注欲以其國敬天禮行五拜三叩臣等責以

天朝定制薄海共遵無得更張乃愧悚聽命臣等渡富良

江至彼國長安門國王黎維禔跪迎臣捧

敕由中門入維禔率文武陪臣聽宣畢行三跪九叩首禮

臣等復宣示

皇上中外一視種種恩德嗣後當倍加忠慎戒飭守邊員

目毋得滋事階禍維禔聞言以手至額者再四誓

世世子孫永矢臣節復送至長安門兼餽贐儀臣

等婉辭不受回至鎮南關陪臣吳廷碩等四員齎

國王陳謝奏章叩乞轉奏臣等伏思安南僻處荒

遠久列外藩

皇上念其累世恭順不忍以片壤故即加兵討且鑒其感

恩悔罪行賞賜地此誠怙冒

鴻慈撫綏

至計臣等睹異地之歡騰識

天威之遐暢謹據實奏

聞祈宣付史館昭垂萬世疏入

上允之是月授刑部左侍郎尋署吏部尚書十一月

遣杭奕祿偕副都統覺羅海蘭赴湖南會巡撫王國棟訊
逆犯曾靜尋

命提犯來京七年九月授鑲紅旗滿洲副都統仍兼侍郎
八年三月奉

旨解侍郎任回旗辦事四月補禮部左侍郎五月署右翼
前鋒統領時準噶爾台吉噶爾丹策凌納青海叛
賊羅卜藏丹津久不獻大軍征之九年二月

上慮陝甘二省民或以用兵為累

特命杭奕祿與左都御史史貽直署內務府總管鄭禪寶率同翰林院庶吉士及六部學習人員國子監肄業選拔貢生等往宣諭化導七月

諭杭奕祿協辦西安軍需其宣諭化導事交史貽直鄭禪寶分辨十年七月署西安將軍十一月

諭曰聞陝西甘涼沿途一帶營伍廢弛總督劉於義事務繁多不能親身察閱著侍郎杭奕祿往來稽查悉心整頓給與欽差大臣關防凡有辦理事宜俱與劉於義酌

行山西近邊營伍與陝西相近者亦著杭奕祿一體稽
查十一年七月

諭曰杭奕祿係朕特差稽查沿邊營伍之大臣理宜體卹
弁兵潔已奉公以副委任今聞其沿途驕奢放縱擾累
兵民甚屬溺職尋奉

旨肅州永遠枷號乾隆元年二月

召來京授額外內閣學士三月補工部右侍郎時恭修
世宗憲皇帝實錄

命杭奕祿充副總裁四月

遣往西藏駐劄辦事十二月轉工部左侍郎四年四月
奏言西藏西南三千里外巴勒布國有三汗一名
庫庫木一名顏布一名葉楞雍正十二年曾通貢
近三汗交惡臣遣貝勒頗羅鼐宣諭罷兵三汗歡
欣聽命遣使進三部落戶口數並金銀絲緞及珊
瑚念珠等物報

聞六月遵

旨還京調刑部左侍郎十二月襲其從兄戶部侍郎申
珠渾所遺三等輕車都尉世職五年二月奏言巴
塘裡塘土司品秩同所屬地方亦相等歲給養廉
巴塘一千兩裏塘祇一百三十五兩請將裏塘土
司二員養廉量增

詔於裏塘地方征收錢糧內交打箭爐充餉者以四百
兩增賞土司用示優恤三月擢左都御史四月兼
議政大臣十二月因秋審冊錯擬緩決降二級留

任十年十月以老病乞休

諭曰卿才品優長簡任風紀正資料理著照舊供職十

一年閏三月

上察其行走艱難

命以原官致仕十三年七月卒子哈豐阿襲三等輕車

都尉世職任山西叅將

溫福

溫福滿洲鑲紅旗人姓費莫雍正六年由繙譯舉

人補兵部筆帖式九年往北路軍營隨撫遠大將
軍平郡王福彭辦理軍務十二年兵撤回京乾隆
五年授兵部主事八年遷員外郎在軍機處行走
十年遷吏部郎中十一年六月調戶部銀庫郎中
十二月擢湖南布政使十四年調貴州布政使十
九年以辦理平遠州民陳新序閔堂一案草率完
結奉

旨革職自備資斧於烏里雅蘇臺辦理糧餉効力贖罪

二十三年三月

命署內閣侍讀學士隨赴定邊將軍營辦事四月實授
時將軍兆惠統兵至庫隴癸山有宰桑恩克圖等
率二百餘戶據山險我兵乘霧夜擊之溫福同副
將高天喜攜大礮登山擊賊俱斃十月隨大兵勦
賊葉爾羌二十四年二月奉

諭據將軍兆惠奏侍讀學士溫福打仗手受鎗傷顙骨
受鳥鎗擦傷且於諸處奮勉効力著加恩補授內閣

學士是年回部平奉

旨議敘軍功加六級紀錄九次二十五年回京授鑲紅
旗漢軍副都統二十六年授倉場侍郎二十七年
特恩賞給世襲雲騎尉三十四年授福建巡撫三十五
年入為吏部侍郎在軍機處行走七月授理藩院
尚書尋署工部尚書八月兼正黃旗蒙古都統三
十六年八月奉

旨授副將軍統兵勦金川時大兵分三路進溫福率兵

二千餘由瓦寺之巴朗拉提督董天弼由甲金達
援達木巴宗總督阿爾泰由約咱攻僧格宗十一
月丁酉奏言阿爾泰董天弼於六月間一聞金川
據革布什咱小金川乘勢圍鄂克什之信即分西
南兩路夾擊尚非失計而董天弼忽改由木坪是
以明正侵地雖克復而賊酋得悉衆固守約咱以
拒我兵且西路兵經董天弼帶往木坪之外現在
福昌處只留千餘分守各隘餘兵無幾以致不能

進攻臣思此事辦理之始所以兼從南路進者原
因金川據革布什咱是以就已到官兵於此進勦
然道遠本非正路當以西路為正兵且此路原係
從前征勦金川之地其小金川巢穴即各營駐兵
之所今南路自章谷進攻而西路自北直進取其
中堅前後夾攻使賊腹背受敵不難殄滅以臣愚
見南路現集兵八九千名已不為少木坪一路雖
再添兵亦屬無益查西路由汶川出口除山神溝

巴朗拉之外自必尚有可進之路奮力夾攻似可
得力奏入

諭獎所見已得要領竝俟捷音尋

諭軍機大臣曰辦理小金川一事溫福以西路與賊巢
最近欲於西路進攻自為扼要之見但形勢亦不可
不為審度賊人所以拒守巴朗拉者原因攻圍鄂克
什遂於要隘設築碉卡扼我援兵賊既以為負隅之
勢即幸藉大礮力攻破一碉賊即乘其殘壘復築勢

豈能層層攻擊若於用礮之外令士卒輕冒矢石倘稍有挫損更不成事體此時南路既有重兵西路復添兵力僧格桑自必守兩路不暇他計朕意總以為攻取要策必當避其碉卡越道而進使賊人失其憑恃官軍得以乘間擣虛方為制勝之道著溫福悉心籌辦丙辰授武英殿大學士復

諭曰溫福現已馳至巴朗拉扼其要害但其地山嶺險峻并與賊巢相近碉卡又多該處所有川兵不及二

千且漢兵士練遇事俱不足仗萬一稍有退阻僅存
溫福所帶之滿洲兵二百名其勢未免單弱溫福前
奏至彼察看事機如刻難少待即就現有之兵奮力
前進但亦不可不詳審形勢明於彼此進退之機方
可進攻若銳意深入兵力不充賊人既無所畏憚且
恐約咱甲金達兩路同時會勦更不足以壯聲援溫
福務當善體朕心加意慎重董天弼兩路惟恐其懈
於急攻溫福一路則惟恐銳於輕進屢念相同而於

溫福尤甚十二月奏攻巴朗拉賊抗拒情形得

旨溫福等帶領官兵攻打巴朗拉碉卡殺賊頗多殊屬
實心任事惜其時兵數無多而綠營士卒又皆懦怯
不克成功溫福何罪之有仍著交部議敘庚寅偕叅
贊五岱等攻巴朗拉三晝夜殲賊數百生擒十二
破大碉六小碉二得

旨溫福等以滿洲官兵在前綠營官兵在後晝夜攻打
甚屬奮勉實堪嘉予似此聲勢賊人自必膽落不日

即可集勲溫福著賞給小荷包二對三十七年正月
戊戌取達木巴宗撥兵分據南北山最高處所得
石碕悉焚之乙巳復分兵由別斯滿瑪爾瓦濟兩
路夾攻大軍由中路進攻至斯底葉安賊寨獲碕
卡百餘殲賊三百

上嘉之三月丁未奏攻克資哩賊寨丁巳奏攻得阿喀
木雅六月乙丑奏克東瑪賊寨七月丁酉奏攻得
固卜濟山梁碕卡十月乙未奏攻得路頂宗及喀

木色爾大小卡寨五十餘碉房三百餘十一月丙午奏據博爾根山梁並攻得瑪覺烏寨落

上以簇拉角克那拉覺等處賊碉林立與我兵後路相通者甚多溫福等宜善為防範壬子奏攻得達克蘇山寨碉卡己未奏攻得附近明郭宗一帶山梁山溝及沿路碉卡移駐大營偵道以圖直攻美諾十二月乙丑奏攻得公雅山皆有

旨議敘癸酉授定邊將軍丙子奏攻得明郭宗

諭曰溫福督兵進勦攻克賊巢緊要門戶從此直搗美
諾自可迅奏膚功溫福著交部議敘辛巳奏由帛噶
爾角攻得布朗郭宗復進攻克底木達擒僧格桑
之父澤旺解京得

旨交部從優議敘三十八年二月初額駙色布騰巴勒
珠爾偏徇叅贊五岱等款

詔革五岱職遣戍伊犁色布騰巴勒珠爾坐削爵是月
辛巳奏攻得功噶爾拉等處三月丁酉奏攻得昔

嶺碣卡嗣因冰雪深厚屢攻未能得手移營木果
木分兵守隘口賊佔大營後路劫礮局六月辛亥
溫福率衆禦中鎗而亡先是溫福叅奏侍衛烏什
哈達等私離汛地

皇上慮其輕躁僨事

特諭曰伊等不遵將軍號令固不得謂之無罪但溫福
即欲辦理烏什哈達亦覺過當烏什哈達理應看守
所佔之處遣兵寄信溫福不應將兵帶回此其罪也

但烏什哈達亦曾攻碉奪卡今棄山岡而能復行佔
據亦可以抵罪溫福平時口吃在朕前奏事尚不能
達其意性又頗露急躁官兵不知其如此必謂將軍
性躁兵衆難堪又因不能即克地方心中煩躁不論
地險雪深一味催迫官兵如此辦理恐失軍心不可
不戒也至是果失事奉


旨溫福倉猝遇變臨陣捐軀著賞一等伯爵世襲罔替
入祀昭忠祠並賞銀二千兩治喪其應得卹典仍著

該部察例具奏伊子永保即著承襲伯爵七月辛丑復奉

諭曰前聞溫福在木果木軍營遇變捐軀賞給一等伯爵嗣據劉秉恬奏初九日未時忽有客民二三千並匠役人等奔赴登春詢稱木果木礮局已被賊人搶劫大營四門關閉客民無所依倚因各散回初十日賊番悉衆擁至斷絕大營水道綠營兵潰散遂至失事等語是溫福軍營民散在前兵潰在後實係溫福

不能先事預防所致營中礮火係三軍之命若聞賊繞布朗郭宗之信早派精兵嚴守後路防護礮局何至為賊搶劫而客民匠役數千亦當收之營內為彼護持即備人數以壯軍威亦無不可斷無堅閉營門聽其散去之理既示賊番以弱且至搖惑軍心則溫福之倉皇失算其死皆由自取今復據海蘭察富勒渾等查奏溫福軍營陣亡文武大小各官多至數十人而將弁兵丁之未出者至三千餘人此皆溫福乖

方失事以致折將損兵使其身尚在即當立正典刑
以申軍紀豈可復膺五等之封所有賞給伯爵著銷
去但念其究係陣亡仍著交部照例議卹其應得何
世職即令伊子永保承襲旋部議給騎都尉兼一雲
騎尉與原有之雲騎尉應歸併為三等輕車都尉
四十一年三月撤銷子勒保現任陝甘總督永保
現任喀什哈爾叅贊大臣



欽定八旗通志卷一百七十四